

**EIGHTH LEGISLATIVE ASSEMBLY OF MIZORAM  
(TENTH SESSION)**

**LIST OF BUSINESS**

FOR FIRST SITTING ON TUESDAY, THE 6<sup>th</sup> SEPTEMBER, 2022  
(Time 10:30 A.M. to 1:00 P.M. and 2:00 P.M. to 4:00 P.M.)

**QUESTIONS**

1. **QUESTIONS** entered in separate list to be asked and oral answers given.

**LAYING OF PAPERS**

2. **PU LALCHAMLIANA**, Minister to lay on the Table of the House a copy each of the following:  
 i) The Mizoram Private Security Agencies Rules, 2022.  
 ii) Notifications issued under the Mizoram Good and Services Tax, 2017 (w.e.f. 21.03.2022 - 05.08.2022)
3. **PU R. LALZIRLIANA**, Minister to lay on the Table of the House a copy each of the following:  
 i) 11<sup>th</sup> Annual Report for the year 2018-2019 of the JERC for the State of Manipur and Mizoram.  
 ii) 12<sup>th</sup> Annual Report for the year 2019-2020 of the JERC for the State of Manipur and Mizoram.  
 iii) 13<sup>th</sup> Annual Report for the year 2020-2021 of the JERC for the State of Manipur and Mizoram.

**PRESENTATION OF REPORT**

4. **THE SPEAKER** to present to the House the Tenth Report of the Business Advisory Committee for the current session.

**LEGISLATIVE BUSINESS**

***Bill for introduction, consideration and passing***

5. **PU LALCHAMLIANA**, Minister to beg leave of the House to introduce The Mizoram Goods and Services Tax (Amendment) Bill, 2022.

**ALSO**

***to introduce the Bill***

***to move that the Bill be taken into consideration***

**AND**

***to move that the Bill be passed.***

H. LALRINAWMA  
Commissioner & Secretary

\*\*\*\*

**SPEAKER** : *Chuvangin, unaute u, a kohna leh a thlanna che u chu tinghet turin taihmak chhuah lehzual rawh u: Chung chu in tih zawngin eng tikah mah in tlu lo vang.*

II Petera 1:10

Awle, vawiin ah hian thilthar, hmanraw thar kan nei a. Pathian khawngaihna. NeVA kan han tichho a ni a, in hriat angin dawhkanah khan kan rawn dah a. Hei hi ‘paperless’ an ti a, amaherawhchu, a la ni tak tak thei lova, ‘less-paper’ ti ila a tha awm e. Hemi atan hian Ministry of Parliamentary Affairs in cheng vaibelchhe riat leh nuai sawmsarih min rawn pe a. Kan Finance Minister, Chief Minister zahawm takin State matching share min rawn pe nghal a, kan lawm em em a ni.

Member zahawm tak te hian tun Mizoram Legislative Assembly chhung hian National e-Vidhan application an hmang vek a, kalpui zel turin hma kan la chho zel a ni a. He House-ah hian National e-Vidhan application hman a nih theih nana buaipui tur bik team ten khawl leh bungrua te a theih ang angin an an rawn set-up a. Amaherawhchu, kan table te hi a te a, a theih dan ang angin kan han ti nawk nawk a ni. Inhriatthiam pawh a ngai awm e.

Tin, tunah hian bultan kan nih avangin hemi hi kan han ti chhin ang a. Amaherawhchu, paper pangngai hi a hman theih tho a ni, ‘tuna tan chuan’ tih kha ka sawi duh a. Tin, e-Book hmangin House document pawimawh te a awm hlawm vek a. Chutiang bawkin UP file kan nei bawkin tih kha. Tun Session chhung hian e-Book hi hmang tangkai turin member zahawm takte kan in ngenin kan in beisei a. Training pawh kan nei vek tawh a. Amaherawhchu, duhtusama kan nal vak loh pawhin kan in hrethiam ani ang chu.

He project a hlawhtlin theihna tura kan official te, kei ngei pawh Parliamentary Affairs Ministry lam te ka zu hmu a. Hetianga kan hmang hlawhtling dawn hi a lawmawm khawp mai.

Awle, tunah chuan *Zawhna & Chhanna* ah kan kal tawh ang a. Zawhna kha han click zeuh ula. *Starred Question* No.1 zawt turin member zahawm tak Pu VL Zaithanzama i lo sawm ang u.

**PU VL. ZAITHANZAMA:** Pu Speaker, ka lawm e. Excise & Narcotics Department enkawltu Minister zahawm tak chhan atan ka zawhna te chu heng te hi a ni e -

- a) Sawrkarin Wine Rules siam a tum em?
- b) Kuthnathawktute grape tharchhuah hi sawrkarin engtia kalpui zel nge a tum?

**SPEAKER** : Chhang turin a changtu Minister zahawm tak Dr. K. Beichhua ka sawm e.

**DR. K. BEICHHUA, MINISTER:** Pu Speaker, ka lawm e. Member zahawm tak Pu VL Zaithanzama zawhnate chhanna chu heng hi a ni e -

- a) Mizoram Liquor Prohibition Act, 2019 Rules-ah grape wine hi telh tum a ni e.
- b) Department of Excise & Narcotics atang chuan sawrkarin grape tharchhuah kalpui zel dan tur a hre lo. Allocation of Business-ah Grape hi Excise & Narcotic ah a tel lo.

**SPEAKER** : *Zawhbelhna* - Zawt turin member zahawm tak Pu VL Zaithanzama ka sawm leh e.

**PU VL. ZAITHANZAMA:** Pu Speaker, ka lawm e. Kan Minister zahaawm tak chhan atan ka zawhbelhna chu-

- i) Grape wine mualpho taka mante kha engtikah nge pek kir annih dawn?
- ii) Grape wine man sakte kha cheng sangthum chawitir anni tih ka lo hria a, he cheng sangthum hi pek kir anni dawn em?
- iii) Kan Minister zahawm takin chanchinbu mite nen an inkawmnaah khan, Grape wine ni lo zu tak, millennium centre-ah khan man tel angin a sawi a. Kha kha a lehlamin man lovin an sawi si a, a chhanna chiang min pe thei em?

**SPEAKER** : *Zawhbelhna* - Zawt turin member zahawm tak Dr. K. Pachhunga ilo sawm ang.

**DR. K. PACHHUNGA** : Pu Speaker, ka lawm e. Pu Speaker, i hmalakna *paperless* hi a ropui ka ti khawp mai. Ka zawhbelhna chu -

“Party dang te hian wine rules hi rem an tihna a awm ve em? Awm ta se, eng party nge an nih” tih a ni e.

**SPEAKER** : *Zawhbelhna* - Zawt turin grape ching uarte lampang atangin, member zahawm tak Dr. Thiamsanga ka sawm e.

**DR. ZR. THIAM SANGA** : Pu Speaker, ka lawm e. Wine Rules sawrkarin a lo siam ta hi a bik takin Champhai leh Hnahlan a grape chingtute tan leh, chu mai ni lovin Mizoram kuthnathawktute tan chhanchhuah kan lo ni ta a, bung thar kan lo thleng ta hi he sawrkar, Pu Zoramthanga kaihhruai sawrkarin kuthnathawktute a ngaihtuah zia leh a ngaih pawimawh zia a lang hlein kan hria a, a hmasain lawmthu ka sawi a ni.

Tichuan, Pu Speaker, ka zawhbelhna chu – Wine Rules sawrkarin a lo siam takah chuan Excise Duty (tax) te lak tum a ni em? Tin, sawrkar control-na hnuaiiah vek he Wine Rules leh permit chungchang thleng hian a kal dawn em? Tin, Wine Rules -ah

hian ram pawnlam atanga kan grape te siam leh lak luh ve theih a ni dawn em, tih kha ka zawhna a ni bawk a.

Tin, chu bakah chuan, hetiang a ‘Wine Rules’ tih a lo nih takah hian, ‘Wine Rules’ ti mai lo hian ‘Grape Wine Rules’ tih ni thei se tih hi ka rawn ngenna a ni a. A chhan chu grape atang ngeia tharchhuah wine kha a duhawmin ka hria a. Hei hi kuthnathawktute chawisanna a ni dawn a. Chutiang anih loh chuan thildang dang atang te hian wine hi siamchhuah a ni ang tih hi a hlauhawm a. Khavang tak khan ‘Grape wine’ tih hi telh ni thei se tih hi ka zawhna a ni e. Ka lawm e.

**SPEAKER** : Awle, a theih ang ang a chhang turin a changtu Minister zahawm tak Dr. K. Beichhua ka sawm e.

**DR. K. BEICHHUA, MINISTER:** Pu Speaker, ka lawm e. Member zahawm tak Pu VL Zaithanzama zawhna kha chhanna chu -

Tunah hian Rules chu Council of Ministers-in a pawm tawh a, notification turin Law-ah kan kal tir mek a, Law lamin vetting te an ti ang a. Tun atanga reilote, vetting zawhah notification a chhuak ang a, gazette a ni leh ang a. Chumi rules ang chuan man tawh te kha hotuten tihdan tur an ngaihtuah ang tih kha ka chhanna ni se.

Pahnihnaah chuan – “Cheng sangthum chawitir pek kir” tih kha, hei hi Mizoram Liquor Prohibition Act ang hma lak leh man anni a, pek kir tumna a awm lo e.

Tin, ‘grape ni lo, zu tak’ tihlai kha, millennium centre-ah khan ni 27, May thla khan man kan nei nual mai a, chungte chu - ‘dagon beer’ kan tih te, Soju, ‘Korean wine’ kan tih ang chi te, ‘dark wine’ kan tih te, kingfisher beer te, ‘white soju, mujak soju’ tih te man a ni.

Member zahawm tak Dr. K. Pachhunga zawhna, “party dang ten wine siam chungchangah hian remtihna an nei em” tihlai kha; hei hi Grape Growers Society ten political party pathumte atangin an remtihna an lo la thlap a. Chung political party pathumte chu - Congress Party, BJP Party leh ZPM Party atangin an remtihna an rawn la thlap a ni.

Tin, MLA zahawm tak Dr. Thiamsanga zawhna, “Excise and Duty Tax lak a ni dawn em” tih kha, ‘la dawn e’ tih kha ka chhanna ni ta se. Tin, “Rampawn atanga grape lakluh hi wine atan siam phal a ni em” tihlai kha, kan rules-ah chuan “Mizoram chhunga grape thar ngei ni se” tih a ni a, rampawn lam a mi kha chu phal a ni lovang.

Tin, Wine Rules ni lovin MLP Rules ah Grape wine siam phal a ni dawn a, a rawn sawi ang chiah khan kan ti e. ‘Wine’ tih hma chiahah khan ‘Grape’ tih a tel zel ang. Pu Speaker, ka lawm e.

**SPEAKER** : Starred Question No. 2 ah kan kal ang a. Zawhna zawt turin member zahawm tak Pu C. Lalsawivunga i lo sawm ang u.

**PU C. LALSAWIVUNGA:** Pu Speaker, ka lawm e. Power & Electricity Department enkawltu Minister zahawm tak chhan atana ka zawhnate chu-

- a) Mizorama district capital zingah Solar town/Solar city a puan fel tawh engzat nge awm?
- b) Chungte chu eng district te nge?

**SPEAKER** : Chhang turin a changtu Minister zahawm tak Pu R. Lalzirliana i lo sawm ang u.

**PU R. LALZIRLIANA, MINISTER:** Pu Speaker, ka lawm e. Member zahawm tak Pu C. Lalsawivunga zawhna chhanna chu –

- a) Mizorama district capital zingah Solar town/Solar city a puan fel tawh pakhat a awm.
- b) Chu chu Saitual, Saitual District a awm a ni.

**SPEAKER** : *Zawhbelhna* zawt turin a zawhna neitu Pu C. Lalsawivunga ka sawm e.

**PU C. LALSAWIVUNGA:** Pu Speaker, ka lawm e.

Kum 2018 MNF election manifesto-ah khan, “District Headquarters zawng zawng hi Solar city/Solar town a puan a ni ang” tiin dah a ni a. District 11 kan nei a, Saitual District bik kha solar town a puan a lo ni ta a. A dang zawng district 10 kha Solar city/Solar town atan kan sorkar hian puan a tum ve em, engtikah nge” tih kha ka zawh belhna pakhatna a ni a.

Tin, thu a sawi mai hi chu a awl thin a, “election manifesto-a kan intiamna a nih ang hian a tak taka tih hlawhtlin tur a ni em, tih leh ngaihruatna (dreams) mai a ni em” tih kha ka zawhbelhna a ni a.

A pathumna ah chuan - District 11-a district 10 Solar town/Solar city-a puan la ni velo te hi, engnge puan an nih ve lohna chhan, eng harsatna nge awm” tih kha ka zawhbelhna a ni bawk e.

**SPEAKER** : *Zawhbelhna* zawt turin Member zahawmtak Pu L. Thangmawia ka sawm e.

**PU L. THANGMAWIA** : Pu Speaker, lusunna raphlak tak in tawhnaah he House member ten kan tawrhpu takzet che a, chuti chungam ram rorelna a i lo kal hi a mak ka ti a, vawiin chu ilo kal lo turah ka ngai a, Pathianin in chhungkua pawh a awmpui zel che u ka duh a.

Tin, kan Minister zahawmtak Power changtu hi Mizoram-a kan minister te zinga cabinet minister term thum a zawna awm hmasa ber a niin ka hria a, a dawt leh tur hi kum 20, kum 30 chhung hian kan awm tawh kher ang em tih kha kan sawi duh bawk a.

Kan zawhbelhna chu - Hei, ka bialah hian hmalakna hrang hrang a awm a, Mizoram hmun hrang hrang pawh a awm a, solar lamah hian. Vankal Solar Park hi engtikah nge hawn theih a ni ang? Megawatt 20 pe chhuak thei tur a ni a, vaw li vel ka han tlawh tawh a, kan sawrkar hnu hian. Hemi enkawl tur hian Kawlkulh-ah hian Power & Electricity Sub-Division hi dah hi a tul viau lo maw, min dahsak thei ang em?

Tin, khithah khawchhak lam Burma ramri depah Kawlbem Small Hydel Project a awm bawk a. Hmanni deuha ka va tlawh khan khawl an lo bun mek a, kha kha hawn mai theih tura tih ni si, tun thlenga hawn theihloh ala ni hi engnge a chhan? Hei hi kumin December hma ngei hian min commission sak thei ang em?

Ka lawm e, Pu Speaker.

**SPEAKER** : *Zawhbelhna* zawt turin a phar hmasa tlat mai; Member zahawmtak Pu Lalrinsanga Ralte ka sawm e.

**PU LALRINSANGA RALTE:** Pu Speaker, ka lawm e.

Hei, kan Power Minister zahawm tak te hmalakna a ropui hlein ka hria a, ka bial lamah khumi ramria kan harsatna thin 'Buarchep leh Aitlang' kan tihah khuan power, current line pawhluh vek a ni tawh a, transformer te dah thar a ni a, hmalakna ropui tak kan bialah kan hmu a, 'kan lawm tak zet a ni' tih kha kan sawi duh a. Tin, chutianga hmalakna tamtak kan bial chhunga a awm takah chuan, SDO hun rei tak staff indaihlohna vangin kan lo neih tawh lohna vangin tunah hian kan hruaitute, Vairengte a kan joint VC te, kan party hruaituten ngenna an rawn siam a, kan Minister zahawmtakin SDO min han dah thar sak te hi 'kan lawm takzet a ni' tih kha thuhmaah ka han nei duh a. Ka zawhna chu hei hi a ni e –

Vairengte - Aizawl Power House line, mainline a ni ang chu, hei hi Mizoram-a current line upa ber a ni a. Kum 1978 vela pawhluh (thlun) a ni tawh a, hei hi a hlui

tawh khawp mai a. Tin, a bik takin khumi Bawktlang atang khuan Bilkhawthlir kaltlangin Vairengte line khu cheithat emaw, thlak emaw hi a ngai tawh khawp mai a. Khu khu hma min laksak thei ang em? Tower system anga kalpui anih theihna turin kan Minister hian chak takin hma min lak sak thei ang em?

Tin, Sentlang, Serkhan - Bagha Road lamah Sentlang atang khuan Bukpui thleng khu line thlak fel a ni tawh a. Bukpui atang khuan Thingthelh leh Hlimen piaphlam hi line a tha lo em em mai a, ban a tlu lek lek hlawm a. Tin, a cable te pawh 'LT line' kan tih te pawh a tha tawh lo viau mai a. Khumi khawhnih bika khu kan la zawh loh a ni a, khu khu hma chak takin min lak sakin min thlak sak thei ang em?

**SPEAKER** : A theih ang anga chhang turin a changtu Minister zahawmtak Pu R. Lalzirliana ka sawm e.

**PU R. LALZIRLIANA, MINISTER:** Pu Speaker, ka lawm e.

Member zahawmtak Pu C. Lalsawivunga zawhna neitu khan, "District 11-a pakhat hi Solar City a puan a ni a, a bak hi engtin nge ni dawn" a rawn ti a, tin "a tak taka tih hlawhtlin tur a ni em" tih te No. 2-na ah a rawn zawt bawk a. Tin, "puan la nilo te hi engtia tih tur nge" tih kha, pakhatna zawhbelhna khan a keng tel reng tawh a. Chutiang chuan hei 'solar city' kan tih hi keimahni phuahchawp a ni lova, Central sawrkar MNRE ina solar city emaw, solar town emaw, pakhat tal chu district tinah puang turin min rawn ti a, chutiang tur chuan kan han puang ve a ni a.

Hei, keini pawh MLA/MP ten model village an siam a, Prime Minister-in 'model village neih vek tur' a rawn ti a, MLA zawng zawngte leh MP ten Model Village tur kan han thlang a. Amaherawhchu ti tura min titute khan sum leh pai a hranpain min pe lova, keimahni theih ang anga chei a ni mai a, MLA te pawhin kan han puang ve a, kan puan ve kha chuan an khua kan puan te khan an lawm ve viau a ni. Tam tak tih hleihtheih a ni lova, chutiang ang deuh chiah chu a ni a, solar city tih vel te hi. chuvangin sum min pe lova MNRE ah tunah hian, hetiang anga nangmahni min rawn tih tir a ni a, kan lo puang ve tawh a, in thu angin. Chuvangin "a enkawl zuina tur sum min pe rawh u," kan ti a, kan dil mek a ni. Chuvangin, khua, district tina mi ang chi te kha, bial tina mite phe chu a harsa deuh rih awm mang e aw kan ti a ni. Chu chu Pu Vunga zawh belhna ka chhana kha ni sela.

Tin member zahawm tak Pu L. Thangmawia khan, "Vankal solar park hi engtika hawn theih nge ni ang" a rawn ti a. Kum pangngai ang chu nise kumin hian kan hawng ngei ang tih ka ringin ka beisei a, hawn hun tur a tih kha a ni bawk a. Amaherawhchu kum hnih dawn lai hnathawk thei lovin kan awm a, kuminah kan hawng thei dawn lova, nakum 2023-ah hawn a ni ang a. Kawlkulh sub-Division hi khilailah solar park kan siam chuan sub-Division siam loh theih lohin a lo kal dawn a. Chuvangin, 'Kawlkulh-ah nge

kan dah ang a, Vankal-ah' tih bialtute nen kan la ngaihtuah ang a. Sub-Division hi chu hawn a tul ang.

Tin, Kawlbem hi megawatt 4 lai pechhuak thei tur a ni a, hawn theih tur a kan beisei tawh a ni a, hun kan neih hmasakah chuan hawn kan rilruk tawh a ni. Chu chu ka chhanna ni sela.

Member zahawmtak Pu Rinsanga zawhna kha, a sawi ngun tawh khawp mai a, Bilkhawthlir, Vairengte atanga lo kal, khulai Bawktlang rawn kala helaia rawn chhuak chho khu Mizoram-ah chuanin kan line upa ber a ni tawh a, hei hi thlak a ngai tawh khawp mai a. Khumi a thatloh chuan phai lama kan power chawkluhna hi a buai thei a. Chuvangin, session hmalama ka sawi tawh ang khan, Power Department hi an lo advance viau a, an lo chak viau a, hmun tam takah electric hrute zamin eng min lo pe tawh a. Chuvangin, khulai khu kan ngai pawimawh khawp a, kan sawrkara finance lam te leh Chief Minister te pawhin min ngaihpawimawh pui ka beisei a. Pawisa awmna tur kawng hrang hrang dap a ni ang a, helai hi thlak turin hma kan lo la chho zel ang.

Tin, 'Sentlang, Bukpui, Thingthelh, Hlimen' tih vel line kha MLA hian a sawi ngun tawh avangin, theih tawpin sum nei leh nei lovin kan han thawk chho a. Thingthelh leh Hlimen hi kan hmabak deuh a la ni a, heng te pawh hi 'a tul angin kan lo en zui dawn nia,' tih kha ka chhanna ni sela.

**PU K.T. ROKHAW** : .....(*audio failure*)... Supplementary Zawhna vawi-2 chauh kan nei thei si a, khawngaihin min lo chhang nghal thei sela ka lawm khawp ang. Ka zawhna chu - "Tuipang Hydel project kha engtik ah nge a function ang" tih a ni e.

**PU R. LALZIRLIANA, MINISTER:** Pu Speaker, Tuipang hi a pawimawh khawp mai a, hei a bialtu hian a ngai pawimawh a, House session kan neih apiangin a dinpui niin ka hria a, sawrkar pawhin kan ngaipawimawh a hei hi. A khawl pahnih la peihloh deuh a awm a, chuvangin tunah hian kan peih mai lova, kumin 2022 chhung hi chuan hawn theih kan in beisei a ni.

**SPEAKER** : Starred Question No. 3-naah kan kal leh ang a. Zawhna zawt turin member zahawm tak Pu Lalduhoma ka sawm e.

**PU LALDUHOMA** : Pu Speaker, School Education changtu Minister zahawmtak chhan atana ka zawhna chu –

“Serchhip DIET-ah Science leh Mathematics lecturer hi dah leh theih a ni ang em” tih a ni e.



**SPEAKER** : Chhang turin a department enkawltu Pu Lalchhandama Ralte, Minister zahawmtak hi a zin a, leave a rawn la a, tunge charge a pek aw? Aw le, Chief Minister zahawm tak Pu Zoramthanga chhang turin ka sawm e.

**PU ZORAMTHANGA, CHIEF MINISTER:** Pu Speaker, i sawi ang khan kan Minister, School Education changtu a zin avangin mawh ka lo la a, chumia *Zawhna leh Chhanna* kan lo neih chu –

“Dah leh theih beisei a ni e” tih a ni e.

**SPEAKER** : *Zawhbelhna* zawt turin member zahawm tak Pu Lalduhoma ka sawm leh e.

**PU LALDUHOMA** : Pu Speaker, nakum inthlan lo awm leh tur atan khawiah mah candidate puan a la nihloh laiin Serchhip biala ding tur chu special deuh maia han puan kha a ni a. Chutih rualin hei kan lecturer pali ngawt mai min han dahsawn sak leh thung a, a ding tur tan pawh ‘a phurawm loh mai awm mang e aw,’ ka ti deuh a.

F. Vanlalhlimpui hi Aizawl DIET-ah min attached sak a, MC Roluahpuia, kan Science Lecturer hi Siaha-ah, tin, Lalawmpuia, Science Lecturer baw, Lawngtlai-ah. R. Vanlalawmpuia hi Mathematics lecturer a ni a, Lawngtlai-ah baw dah a ni a, pali ngawt mai min suanchhuah sak a, tunah hian Science leh Mathematics lecturer kan nei miah lo a ni. Tunah hian semester 1-na leh semester 2-na a kal mek a, nakum January leh June inkarah hian semester 3-na leh semester 4-na a intan dawn a, chutah chuan heng subject hi zir a ni dawn a. Tunah hi chuan an tel lo pawhin a la ziaawm a, nakum January a thlen hma ngei ngeiin Science leh Mathematics lecturer hi kan neih leh loh chuan naupang tam takin an tuar dawn a ni. Chuvangin kan Chief Minister zahawm tak hian “hemi semester a lo thlen hma ngei hian min dah sak leh ang” tih min tiam thei em aw?

**SPEAKER** : Kan sawi duh chu, kan House hi kum 50-na a ni a. A hma zawng khan a changtu minister awm lovin *Zawhbelhna* lak a ni ngai lova. Mahse tun tum kan ministry-ah hian kan zawhbelh tir a, a awmlah avangin zawh dan kha in thiam deuh dawn nia.

Member zahawm tak Er. Lalzirliana *Zawhbelhna* zawt turin kan sawm e. Chumi zawhah Dr. Thlantea.

**ER. H. LALZIRLIANA** : Pu Speaker, ka lawm e.

Ka zawhbelhna hi DIET chungchang baw a ni a. Keini Mamit Dist. hi ‘Aspirational District’ tih kan ni a. Aspirational Dist. kan nihna hi contributor lian ber

chu education sector hi a ni a. Thanhnem kan ngai ve khawp mai a, a bik takin zirna chungchangah hian. Mamit DIET hi 2005-ah a ding a, full-fledged DIET Centre a ni tawh a. Approvement per post hi 17+1, Lecturer 17 leh Principal 1a ni a. Tuna post awm mek hi 15+1 a ni ta a. Chutah chuan 4 hi Aizawl-ah attached-in an awm mek a. Tuna actual strength chu 11+1 ang kan lo ni ta a ni.

Hman ni lawk August thlaah khan Zomuanpuia Science teacher Lawngtlai-ah transfer a ni a. Hei hi kan CM zahawm tak bial, Zemabawk Veng a mi a ni leh nghal a. An chhungkuaah damlohna, cancer ten a tlakbuak a, sawlaia va awm kha an huphurh ve khawp mai a, Mamit-a la awm te kha an chak ve a ni. Chutilaiin tunah hian Science teacher kan nei ta miah lova.

Chuvangin, approved ang thlap thlap hi a awm theilo pawh ni se la, khulaia mumal taka a function theih nan 15+1 kan han neih ang te hi chu mumal takin neih leh theih dan awm lo em ni? Tin, Science teacher tuna kan neihloh meka hi min dah sak leh thuai thei ang em?

**SPEAKER** : *Zawhbelhna* zawt turin member zahawm tak Dr. Vanlalhlana ka sawm e.

**DR. VANLALTHLANA** : Pu Speaker, ka lawm e.

Kan Chief Minister zahawm tak khan a chhang thei tho turah ngai ila, official ho te an rawn inbuatsaih hman turah ngai ila. Ka zawhna pawh kan paih then a, a then kha chu a changtu minister chauh hriat tur awm deuh te pawh a ni a; pahnih ka rawn zawt dawn a.

A pakhatnaah chuan – P/S-a Headmaster-te hian pay/cadre hran an nei dawn em? an nei thei lo a nih chuan, ‘engnge a chhan’ tih a ni a.

A pahnihna hi tlema sawi deuh hlek a ngai a. NABARD sum hmangin thingtlang lampangah te hma lak a ni a, hmalak dan kha chu kan hre theuh awm e. Amaherawhchu, khawpuiah school kum 30 chuang ni tawh te, kan bial chhungah pawh ceiling la nei lo te a awm a, hmuh hrehawm tak tak an awm a ni. Chung khawpuia school-te hi thawmthat ve tumna a awm em? ₹25,000/- hi kumtluana an dawn a ni a, an lo in manage, an lo inenkawl ve nan. Hei hi chu a beitham si a, hetah hian school thawmthat tumna a awm em?

Tin, kan bialah pawh a ni a, bial dangah te pawh khawpui school-ah hian ECCE te an han din tir a. Indaih viau tura ngaih anih laiin P/S ah class I - IV thleng kha khaw li a ni a, ECCE an han hawntir leh a, zirtirtu 5 an awm a ngai a. Kan bial chhungah

pawh 4 chauh te an lo awm a, zirtituten anmahni pawisain an lo rawih belh a, chutiangte chu an awm a. Hetah hian ‘hmalak theih dan a awm ang em’ tih ka han zawt a ni.

**SPEAKER** : A theih ang anga chhang turin Chief Minister kan sawm ang a. Amaherawhchu, a department chan a nihloh avangin a hnen atang pawhin, kan duh ang kan hmuh loh pawhin kan hrethiam dawn nia. Tunah Chief Minister zahawm tak ka sawm e.

**PU ZORAMTHANGA, CHIEF MINISTER:** Pu Speaker, ka lawm e.

Member zahawm tak leh a zawhna neitu Pu Duha zawhna kha, “Nakum semester hma hian Science leh Mathematic, a bik takin thildang bakah zirtirtu min dah sak thei ang em” tih a ti a. Ni e, a changtu lo chuan kan hre detail lo khawp mai a. Theihtawpa dah a tihchangtlun chu kan lo tum ang a. Heta zawhna chhanna an rawn tihah hian, “Dah leh theih beisei a ni e,” a ti a. Kha kha anih avangin department lam pawhin dah leh tumin an lo inbuatsaih tihna a ni a. Chuvangin, sawrkar lamah pawhin kan tihtheih ang chin chin chu “theihtawpa phuhruk tumin hma kan lo la ang e”, kan ti a ni.

Kan sawn pheih te ho kha humanitarian ground a dah chhuah te anni hlawm a. Khami avang khan kan dah dana kha *pupil:teacher ratio* inang tlang thei deuh hlek turin DIET-a lecturer te hi an sem rual a, chutiang chuan kalpui a ni a. Engpawh ni sela, zirtirtu dang ang bawkin DIET-ah pawh hian an indaih lo hle a, hmalakna tur kan ngah khawp a. Engpawh ni se, sawrkar lam atangin theihtawpin kan lo enpui ang e.

Chutiang bawkin kan Member zahawm tak Mamit bialtu Pu Zira’n a han sawi ang khan, Mamit District-ah pawh Science teacher dah belh an mamawh zia thu kha a rawn sawi a. Khang te pawh kha kan theih ang tawkin hma kan lo la ang a, dah hram dan a awm em kan lo en dawn nia.

Tin, Member zahawm tak Dr. Vanlalhlana zawhna, “P/S a headmaster te pay hran siam a ni ang em” tih kha - Ni e, han siam sak pawh kha a tha khawp a. Engpawh ni se la, heng hi chu depts. leh Finance lam te, DP&AR te pawh rawn chungin kan lo thlir dawn nia. Tin, “khawpuia school tha lo tak tak P/S te pawh a awm teuh mai a, heng hi han thawmthat tumna a awm em” a ti a. Awm e; kan sum neih ang ang leh a tihtheih dan ang angin tih kan tum a. Amaherawhchu, kan ti tam vak thei lovang a, “a harsa zual leh a chhe zual kha chu a mamawh ang zelin thawmthat kan lo tum ang e,” tih kha kan chhanna a ni e.

**SPEAKER** : Starred Question No. 4-naah kan kal ang a, zawt turin member zahawm tak Pu Lalduhoma i sawm ang u.

**PU LALDUHOMA** : Pu Speaker, GAD changtu Minister zahawm tak chhan atan ka zawhna te chu –

- a) Kum 2019 khan Minister-te hman tur Hyundai Verna 11 leh Scorpio 11 lei a ni em? A nih chuan, avaiin engzat man nge?
- b) Kum 2019 khan CM hman atan Jeep Compass 1 leh CM support car atan Renault Duster lei a ni em? Anih chuan, a pahnih hian engzat man nge?
- c) Tun hnaiah CM Support Car atan Jeep Compass lei leh a ni em? A nih chuan -
  - (i) A man zat?
  - (ii) A man hi pek a ni tawh em? “GAD Budget Head atanga lei tura hmalak mek a ni” tih hi a dik em?
  - (iii) “Department Vehicle Purchase Board remtihna lak hmaa lei a ni” tih hi a dik em? A dik chuan, enge hmanhmawh taka lei a tulna?
  - (iv) He motor hi tuin nge hmang?

**SPEAKER** : A chhang turin Chief Minister zahawm tak Pu Zoramthanga, GAD changtu ni bawka sawm e.

**PU ZORAMTHANGA, CHIEF MINISTER:** Pu Speaker, Member zahawm tak Pu Duha a zawhna chhanna chu –

- a) Kum 2019-ah Minister te hman tur Hyundai Verna 11 leh Scorpio 11 lei a ni. Motor zawng zawng hi ₹316,36,539/- (nuai zathum sawm paruk, singthum sangruk, zanga sawmthum pakua) man a ni. Chungte chu -
  1. Verna 4 Nos. @ ₹11,96,223/- = ₹47,84,892/-
  2. Verna 7 Nos. @ ₹11,97,411/- = ₹83,81,877/-
  3. Scorpio 11 Nos. @ ₹16,79,070/- = ₹1,84,69,770/-
- b) Kum 2019-ah CM Support Car atan hman turin Jeep Compass 1 lei a ni. Jeep Compass hi ₹25,56,000/- man a ni. Renault Duster hi CM hman atan lei a ni lo.
- c) Aw, ni e.
  - i) Jeep Compass hi ₹24,24,901/- man a ni.
  - ii) A man hi advance a pek a ni. GAD (SAW) Budget Head Atanga lei tura hmalak mek a ni.
  - iii) Dik e. Jeep Compass hi mamawhna bik leh tul bil thil avanga lei lawk (advanced purchase) a ni. DVPB pawhin a pawmpui tawh a ni.
  - iv) He motor hi hon. Chief Minister Support Car atana detailed a ni.

**SPEAKER** : *Zawhbelhna* zawt turin a zawhna neitu Member zahawm tak Pu Lalduhoma ka sawm e.

**PU LALDUHOMA** : Pu Speaker, Jeep Compass hi 2019-ah lei a ni tih kan hria a, Chief Minister hman turin. “Hei hi a chhe tawh tihna nge, engnge tunah a dinhmun, khawiah nge a awm, tu in nge hmang; tuna a thar han lei leh ngai ta hi a va

chhe hma ve maw le” tih te; tin, advance a lei a ni a, khawia sum nge lo pek lai lawk anih? Tunah hian a sum tura hi process mek chauh a la ni si a.

Tin, DVPB (Department Vehicle Purchase Board) pawmpuina pawh la lova lei a ni tih kha a chiang a. Tunah erawh chuan an lo pawmpui ve tawh tih kha ka kan hre chauh a ni a. Engatinge a sum pawh khawia mi emaw lo hman lawk ngai khawp leh, remtihna pe theitu Board remtihna pawh nghak hman lo em ema, chuti khawpa hmanhmawha lei a nihna chhan hi; eng ang taka hmanhmawh thlak nge a nih tih kha kan hre chak a ni.

**SPEAKER** : *Zawhbelhna* zawt turin Member zahawm tak Pu Zodintluanga Ralte ka sawm e.

**PU ZODINTLUANGA RALTE:** Pu Speaker, ka lawm e.

Heti teh nuai a nih vang hi a ni ang, vawiinah pawh sawrkar hnathawkte hlawh pawh pek hleih theih lovin a awm a. Sawrkar, sawrkar hnathawkte hlawh thla chanve vel hnua an pek lawm ta em em sawrkar kan hrawn a ni a. Member zahawm tak Pu Lalduhomarawn zawhna ang tho kha ka zawhna tur chu a ni a.

GAD Budget Head atanga pawmpui tura hmalak mek sawkarin a buaipui laiin, khawia pawisa nge advance a an lo pek; mimal ta em ni; nge, contractor te pawisa an lo pe zawk, tih hi, Pu Speaker kei pawhin ka hre duh a.

Department Vehicle Purchase Board sawrkarin a din a. Chumi ina phalna a pek loh chuan motor-te hi lei phal a ni thin lova. Chumi phalna awm lova pawisa advanced-a lo latute hi sorkar hian action a la dawn em tih hi ka zawh belhna a ni e.

**SPEAKER** : *Zawhbelhna* zawt turin Member zahawm tak Dr. Vanlaltanpuia ka sawm e.

**DR. VANLALTANPUIA** : Pu Speaker, ka lawm e. Kan Chief Minister zahawm tak, GAD changtu hnena *Zawhbelhna* ka pek duh chu -

He sorkar chak tak hnuaiah hian district thar - Khawzawl te, Saitual te, hnahtial te pek thar a ni a. hnahtial District-ah hian ka bial Lunglei North atangin khaw pasarih rinluh a ni a. Chungte chu remchan zawkna avang tein a ni a, kan lawm angreng viau a. Amaherawhchu khaw pahnih, a tlangdung anga harsatna lian tak neih kan nei a, Chhipphir leh Bualpui (V) hian kan harsat pui em em mai a ni. A laiah hian Mat Lui a luang a, chung chu han cross-a tlangdung pahnih kaltlang ngai a ni a, hei hi kan harsatpui takzet zet a. Kawngpui te a awm lova, a mumal lova, Lunglei District lamah

bawk han hela Hnahthial-ah chhoh leh thin a ngai a, document pakhat han buaipui tur pawh hian cheng tam tak sen a ngai a, hei hi kan harsatpui tak zet zet mai a.

Hon. CM, GAD changtu hnenah pawh hian ka sawi tawh a, DO Letter te pawh ka drop tawh bawk a. Khawngaih takin inthlan hma, tun sawrkar chhung ngei hian Lunglei District-ah hian min dahlet leh thei ang em tih hi ka zawt a ni e.

**SPEAKER** : Aw le, zawhnate a inkarki hlawm hle a, a theih ang anga chhang turin Chief Minister zahawm tak Pu Zoramthanga ka sawm e.

**PU ZORAMTHANGA, CHIEF MINISTER:** Aw le, Pu Speaker, Member zahawm takte, Pu Duha leh Pu Zodintluanga te zawhna kha thuhmunah zuk chhan theih a ni a.

Ni e, kan sawrkar hlim khan motor kan minister-te hman tur kha a tha tawh lo fu mai a. Chuvang chuan, ‘i lei ang u’ an ti a, rawtna kan han nei a. Chumi ang chuan kan Minister 11-te hman tur han ti mai ila, a car leh support car tur kha kan lei ta diah diah a ni. Khatah khan Chief minister hman tur chu, ‘hei, a la tih theih naw naw hi maw, lei loin kan awm thei mai ang’ kan ti a, a hlui kha kan la hmang a ni. Chutiang chuan eng emaw chen kan kal a.

Amaherawhchu kan motor hmana kha a tih theih ta ngang loh a. Kawng chhovah hian nam a ngai a, chuvangin, ‘a tihngaihna a awm lo e’ an ti a. ‘Engte nge kan lei ang’ an ti a, “Ngawi rawh u, thingtlang kawng pawh ngam deuh law law, khawpuiah pawh hman theih i lei mai ang u; amaherawhchu lian pui ni lo se la” ka ti a. Kha kha driver-te leh midangin an han ngaihtuah khan, tha ve thawkhat, a man sang lutuk a ni lova, chutiang chu ‘hei hi a tha ang e, i lei ang u’ an ti a. Tichuan, kha kha kan lei a, kan hmang ta a.

Amaherawhchu, chumi hnu chuan support car pakhat, ‘i thlak lo mai ang u’ ka tiha kha a kal thei ngang ta lova, lei loh theih a ni ta lova, khami a nih avang khan lei leh kha a ngai ta a. ‘Engang nge kan lei ang’ an tih khan, “Jeep Compass kan hman hi a tha riau mai a, diak nal leh eng ilovah a tluk a awm lo, hei hi i lei leh mai ang u” tiin keimahin ka rawt a, kan lei leh ta a. Kan motor kawl pahnih, a tira kan thlak ve loha kha a hnu deuhah thlak a ngai ve ve ta a. Chumi thlak nan chuan Jeep Compass hi kan lei a ni a.

Tin, hmanhmawh deuha lei a ngaihna chu, a pakhat kha a kal thei ngang tawh lova, kan dah tawl titih deuh a. Kan han siam thin a, “ka pu, a thar lei mai rawh, tihngaihna a awm lo” an ti a, chumi avang chuan advance-in kan han book a. Tin, pawisa pawh kha office atangin a remchang tur ang kha ‘advance-a hman tur i ti ang u’ an ti a,

chu chu nakinah phalna peka rulh leh turin. Khatiang anih avang khan ti ta chuk chuk kan ni e tih kha kan chhanna a ni e.

Tin, kan member zahawm tak Dr. Vanlaltanpuia zawhna - Lunglei District-a dah let lehna kha, kan lo en ang a. A hmun remchan ang leh a mipuitena an duh ang khan; a district awmna sawn hi chu harsa lutuk chu a ni lova lawm. Kan lo en ang e.

**SPEAKER** : Starred Question No. 5-naah kan kal ang a, a zawhna zawt turin Member zahawm tak Pu Lalduhoma i lo sawm ang u.

**PU LALDUHOMA** : Pu Speaker, School Education changtu Minister zahawm tak chhan atan ka zawhna chu -

- a) Neihloh Middle School-ah hian Headmaster leh zirtirtu engzat nge awm? Tute nge an hming?
- b) Neihloh Govt. Primary School-ah hian Headmaster leh zirtirtu engzat nge awm? Tute nge an hming?

**SPEAKER** : A chhang turin a changtu minister a awm lo kan tih tawh kha. Chief Minister zahawm tak Pu Zoramthanga ka sawm e.

**PU ZORAMTHANGA, CHIEF MINISTER:** Pu Speaker, a minister awmlah chhunga charge lo lak mai bakah Neihloh zirtirtu hming ho han tihchhuah hi hetia ziaak saa lo awm bak han chhan belhna tur pheih chu a huphurhawm angreng khawp a. Amaherawhchu, hemi chhanna department lamin an rawn siamah hian fel tha takin an rawn siam a. A chhanna chu -

- a) Neihloh Middle School-ah hian Headmaster leh zirtirtu pathum an awm a, chungte chu: -
  - i) C. Lalramhluna, Headmaster
  - ii) Lalrinkima Sailo, SSA Teacher
  - iii) Eli Hmingthansangi, SSA Teacher te anni.
- b) Neihloh Govt. Primary School-ah hian Headmaster leh zirtirtu pali an awm a, chungte chu: -
  - i) R. Lalmuanpuui, Headmaster
  - ii) Sangliana, Teacher
  - iii) Laldanmawia, MR Teacher
  - iv) Lalmangaihzuai, MR Teacher.

**SPEAKER** : *Zawhbelhna* zawt turin a zawhna neitu Pu Lalduhoma i lo sawm leh ang.

**PU LALDUHOMA** : Pu Speaker, Neihloh-ah hian zirtirtu hi kan nei tha ngai lova. Staff quarters-te a awm lova, MLA fund-in tunah sawn pahnih kan sa mek

ringawt mai a. Hman deuhah phei kha chuan headmaster khan chowkidar hnenah khan thuneihna a pe ringawt tawh tih te kha kan sawi a. Kha kha tun hmaa kan awmdan a ni a.

Tichuan, kan middle School zirtirtu pakhat Pi Zothanpari sawta rawn post kha Phunchawng-ah attached daih a ni a, chu chu a rei deuh tawh a, ka han zawt pawh a ni em em lova.

Tunah hian Primary School Headmaster, Lalmuanpuii hi kumin February, ni 25 khan a rawn join a, joining report a pe a, mahse SDEO Office Lunglei-ah attached a ni. Chuvang chuan, headmaster hi kan nei lo a ni. Khatiang khan, rawn zawm si, Neihloh-in a hming tum si, amah kan nei bawk si lova. Hei hi min enfiah sak tur leh, amah hi a remchang lo a nih pawhin midang min pe mai turin ka han ngen a. Tin, midang, heta zirtirtu list, chhanna lo lang ho hi 'Neihloh Primary leh Middle School-ah hian an awm ngei em' tih kha ka han zawh belh a ni e.

**SPEAKER** : *Zawhbelhna* zawt turin Member zahawm tak Pu Zodintluanga Ralte ka sawm e.

**PU ZODINTLUANGA RALTE:** Pu Speaker, ka lawm e.

Hei, vawiinah kan House Leader zahawm takin a rawn chhan avangin zawhbelhna ka rawn siam a, a changtu minister pangngai kha chu ni se ka beidawng tawh a, zawh belh pawh hi ka tum tawh lova.

MNF sorkar hlim atang khan Pu Speaker, sorkarin a tih ber chu thingtlang atanga zirtirtu lak chhuah hi a ni a. Hei, i dinglama thu MLA tam tak, thingtlang bialtute pawh hi han titi khawm hi chuan hrehawm an tih thu, MLA Fund, local area develop-na tura tih sum tam tak zirtirtu rawih nan kan hmang deuh vek a ni.

Ka bial Thenhlum te, Lungsen te, khaw tam takah zirtirtu mumal nei lovin, a awm sa reng sawn chhuah an ni a. Tunah phei chuan Lungsen-ah Pu Speaker, High School-a an zirtirtu regular neih chu sawn chhuah a ni a, an khawtlang an buai em em mai a. Hei hi kan House Leader zahawm takin vawiin niah charge a rawn la a, a chhanna min rawn pe a. Thingtlang dang, khaw dang saw chu anih nih kan ni tawh mai a, Lungsen-a High School zirtirtu, tuna khawtlang kan buai em emna hi chu khawngaih taka House Leader a nihna anga hma min lo laksak turin he House hi min rawn tiam thei se tih kha ka rawn ngenna leh ka rawn dilna a ni e.

**SPEAKER** : *Zawhbelhna* zawt turin member zahawm tak Pu Vanlalhlana ka sawm e.



**PU VANLALHLANA** : Pu Speaker, sorkar enkawl school-te hi a tlachhiain a tlabal em em mai a. Hei kan bial chhungah te bial kan fang a, school-te kan visit thin a, Primary School te, High School te, Middle School te, a tlabal em em ringawt mai a ni. Thenkhat chuan tui connection an nei lova, an fencing-te a chhe em em a. Tin, an building leh furniture hrim hrim pawh a chhe em em mai a ni.

Thingtlang school-te NABARD atanga sak that te, repair-te a tih theih a, khawpui school-te hi sorkar hian tihchangtlun leh chung hamthatna chu a thawk thei em, engtin nge hma lak a tum tih kha ka han zawt a ni.

**SPEAKER** : Aw le, a theih ang anga chhang turin Chief Minister zahawm tak Pu Zoramthanga ka sawm e.

**PU ZORAMTHANGA, CHIEF MINISTER:** Pu Speaker, Member zahawm tak Pu Duhoma zawhna, ‘SDEO Office-a attached’ tih te kha a ni a. A minister lo hawnah ka lo sawi ve phawt ang a. Hei vang hi a ni a, hetia ‘tih theih a ni ang, harsatna a awm e’ tih kha han sawi ve turin ka hre vak bik lova. Chuvangin, Member zahawm tak ten in sawia kha a minister lo hawnah ka lo hrih ve phawt ang a, a tih theih dan a awm nge awm lo.

Ni e, thingtlang khua, Neihloh te phei chu tlema khaw kilkhawr deuh a nih avang khan an harsa hle ang tih pawh a rinawm a. Khangah khan tha takin, a theih ang anga kan peka kan thuam that pawh kan tih tur a ni reng a. Chuvangin, kha lama kha kei pawhin ka lo sawipui ang a. Tin, school dangah te hian an awm kim em ka hre chiah lova. Neihloh zirtirtu awm kim leh kim loh kha aiawha han chhanah chuan thil harsa pawl tak a ni a. Eng pawh ni se la, tha taka an awm kim theihna turin khata zirtirtu dahte kha chu hma kan lo la ang a. An awm kim hram hram hi, zirtirtu indaihloh tawh naka laia awm kimloh hi a pawi em em a. Awm kim turin khalamah khan a minister lo hawnah pawh hma la turin ka lo ti ang a. Tin, ani pawh lo haw ve mai tur a ni a.

Tin, kan Member zahawm tak Pu Zodintluanga zawhna, “Lungsen High School zirtirtu, tunah kan buaina, min thuam tha leh rawh u” a tih kha, department aiawhte pawh va kalin, “sorkar lamin theih tawpin hma kan han la ang e” an ti a, kha kha chu theihtawpa thuam tha zawk turin hma kan lo la ang.

Tin, Pu Hlana zawhna kha nichina kan chhanna ang kha a ni a. A bik takin khawpui chhunga sawrkar sikul enkawlte hi a chhe khawp mai a. Nichina ka chhan tawh ang khan, a theih ang angin thuam that dan kan lo en ang e.

**SPEAKER** : Starred Question No. 6 zawt turin Member zahawm tak Pu Nihar Kanti Chakma ka sawm e.

**PU NIHAR KANTI CHAKMA:** Pu Speaker, ka lawm e. Rural Development Minister zahawm tak chhan atan ka zawhna chu -

“Tlabung RD Block hi engtikah nge a function theih ang” tih a ni e.

**SPEAKER** : Chhang turin a changtu minister zahawm tak Pu Lalruatkima ka sawm e.

**PU LALRUATKIMA, MINISTER:** Pu Speaker, MLA zahawm tak Pu Nihar Kanti Chakma zawhna chhanna chu –

“Sawrkarin hma a la mek a, tun dinhmunah anih dan tur ang a function hun tur tak sawi theih a ni rih lo” tih a ni e.

**SPEAKER** : *Zawhbelhna* zawt turin a zawhna neitu MLA zahawm tak Pu Nihar Kanti Chakma ka sawm e.

**PU NIHAR KANTI CHAKMA :** Pu Speaker, ka lawm e.

A function hun tur la sawi theihloh a ni hi Pu Speaker, a paw ka ti khawp mai a. Tun kum tirah khan kan Chief Minister zahawm tak hi Tlabung-ah ropui deuhin RD Block puanna programme a hmang a. Ka zawhbelhna chu - Tlabung RD Block area tur hi siamfel a ni tawh em? Ni se, a area min hrilh thei em?

**SPEAKER** : *Zawhna & Chhanna* hun a tawp a, a zawt zo law law dawn em ni ang? House ka rawn e. (*House-in a remti a.*) Aw le, zawt zo rawh le.

**PU NIHAR KANTI CHAKMA:** Pu Speaker, Thanzamasora leh Sedailui hi ka bialchhunga sub-village a ni a, MLA inthlan lai pawh khan min vote ve thin a. Amaherawhchu, Lungrang Village Council huamchhungah a awm avangin hemi khawhnihte hi Tlabung RD Block chhungah a dah theih em tih kha ka zawt a ni e.

**SPEAKER** : Anih leh chhan tir law law ang u aw. House ka rawn e. (*House-in a remti a.*) Awle, Pu Lalruatkima, Minister zahawm tak chhang turin ka sawm e.

**PU LALRUATKIMA, MINISTER:** Pu Speaker, a zawhna neitu khan, ‘RD Block min pek hma chu thu ka sawi tawh lovang’ a ti a. Kan sawrkar zahawm takin ni 25, March 2022-a Council of Ministers thukhawm chuan thutlukna siamin, ‘Tlabung leh Kawrtethawveng-ah RD Block siam ni se’ a ti a. Pu Speaker, a thutna tur lam a hai deuh tawh emaw ni chu aw ka ti a.

Hei kan hon. Member hi kum 30 dawn helaiah hian a thu tawh a, RD Block hi mittui tlain a ngen fo a. Tun hunah kan han pe a, a lawm khawp mai a. Session leh ah chuan helamah hian rawn thu tawh sela ka han ngen a, thusawina hun te pawh kha thlamuang takin nei thei turah ngai ila.

Engpawh ni se, a zawhna kha, “Tlabung RD Block area tur kha sawifel vek tawh a ni a, a copy pawh kan pe vek tawh a, amah ngei kha a soft copy pawh kan pe a ni. Chutah chuan, “Tlabung RD Block huamchungah hian khaw 17 a awm ang a, sub-village hi 10 a awm ang” tih a ni a. A bik takin sub-village chungchangah hian authorized sus-village te, sub-village te a awm neuh neuh a. Chutiang anih avang chuan harsatna te pawh a awmthei a. Helaiah hian kan data neih ang ang hian kan la chhuak a ni a.

Tun dinhmunah hian Pu Speaker, ka sawibelh duh chu, a hmunhma te kan hon. Chief Minister hovin ni 29, March 2022 khan Tlabung-ah kan va kal a, a hmunhma tur te kan han en a. Kan ruahmanna hmasa te fuh tawh lo deuha kan hriat avangin, GAD in ram a neih mek Tlabung SDO Civil ram, a office thuthmun, *DLP No. 30 of 2005* leh *DLP No. 31 of 2005*, Tlabung SDO Civil compound leh Tlabung SDO Civil Quarter complex chhungah khan BDO quarter leh office te kan dil a.

Chutiang chuan GAD hian August Ni 26 khan chumi hman phalna chu *In Principle Approval* min rawn pe a. Keini department lam pawhin a tul ang angin a ramri then fel dan tur te leh a in sak dan tur te tunah hian plan estimate kan nei fel tawh a. Hun reiloteah hian kan beisei ang ngei leh mipui ten an nghahhlel ang ngeiin Tlabung RD Block hi function tir turin sawrkarin ruahmanna a kalpui zel a ni.

**SPEAKER** : Awle, *Zawhna & Chhanna* hun a tawp a, *Laying of Papers* ah kan kal ang a. Tunah chuan, Pu Lalchamliana, Minister zahawm takin House-ah -

- i) The Mizoram Private Security Agencies Rules, 2022 leh
- ii) Notifications issued under the Mizoram Good and Services Tax, 2017 (w.e.f. 21.03.2022 - 05.08.2022) te lay turin i lo sawm ang.

**PU LALCHAMLIANA, MINISTER:** Pu Speaker, i phalna leh he House zahawm tak remtihnain, “The Mizoram Private Security Agencies Rules, 2022” hi House dawhkanah ka rawn pharh a.

Tin, ‘The Mizoram Goods and Services Tax Act, 2017’ hmanga notification chi hrang hrang 21.3.2022 leh 5.8.2022 inkara chhuah te he House zahawm tak hmaah hian ka rawn pharh e. Ka lawm e.

**SPEAKER** : A copy kha han sem ula. Kan chang kim em? Kan chankim chuan pahnihnaah kan kal ang a.

Pu R. Lalzirliana, Minister zahawm takin heng *Papers* te hi House hmaa pharh turin i lo sawm ang -

- i) 11<sup>th</sup> Annual Report for the year 2018-2019 of the JERC for the State of Manipur and Mizoram.
- ii) 12<sup>th</sup> Annual Report for the year 2019-2020 of the JERC for the State of Manipur and Mizoram.
- iii) 13<sup>th</sup> Annual Report for the year 2020-2021 of the JERC for the State of Manipur and Mizoram.

**PU R. LALZIRLIANA, MINISTER:** Pu Speaker, ka lawm e. He House zahawm takah i remtihain, heng a hnuai mite hi he dawhkan zahawm takah hian karawn pharh e -

- i) 11<sup>th</sup> Annual Report for the year 2018-2019 of the JERC for the State of Manipur and Mizoram.
- ii) 12<sup>th</sup> Annual Report for the year 2019-2020 of the JERC for the State of Manipur and Mizoram.
- iii) 13<sup>th</sup> Annual Report for the year 2020-2021 of the JERC for the State of Manipur and Mizoram.

**SPEAKER** : A copy kha han sem leh ula. Kan chang kim em? Kan chankim chuan, *Presentation of Reports* ah kan kal ang a.

Tun tum kan Session calendar tur hi Business Advisory Committee (BAC) chuan 24.8.2022 (Nilaini) khan thukhawmin a lo duang tawh a, House-ah BAC Report ka han present e. A copy kha han sem ula.

Member zahawm tak ten in hriat angin, inchhung lamah harsatna kan neih avangin BAC hi kan Deputy Speaker zahawm tak hovin an lo duang a, lawmawm ka ti a. Fel takin ka awmlah pawhin Dy. Speaker hovin in lo ti thin a, ka lawm tak meuh a ni. Tikhan kan chang kim em aw?

Kha kha kan han duan a ni a, min pawmpui thei em, House in? Kan dil e. (*House-in a pawmpui a*) Aw le, a lawmawm e.

Tunah chuan Legislative Business-ah kan kal ang a. Vawiinah hian sawrkar bill pakhat sawiho tur kan nei a, a bill copy member-te hnenah kan hriat angin sem lawk tawh a ni a. "The Mizoram Goods and Services Tax (Amendment) Bill, 2022" hi a bill neitu Pu Lalchamliaana, Minister zahawm takin House-ah introduce phalna rawn dil se, i lo sawm ang u.

**PU LALCHAMLIANA, MINISTER:** Pu Speaker, i phalnain, 'The Mizoram Goods and Services Tax (Amendment) Bill, 2022' hi he House zahawm takah hian introduce karawn dil e.

**SPEAKER** : Awle, Minister zahawm takin introduce a rawn dil a, kan phal em? Kan remti em? (*Member ten an remti a.*) A lawmawm e. Kan remtih chuan, tunah rawn introduce sela, sawiho turin move nghal bawk se. Minister zahawm tak Pu Lalchamliana ka sawm e.

**PU LALCHAMLIANA, MINISTER:** Pu Speaker, ‘The Mizoram Goods and Services Tax (Amendment) Bill, 2022’ hi he House zahawm takah hian ka rawn introduce a, tin, min ngaihtuhsak turin kan ngen nghal bawk a ni.

**SPEAKER** : Aw le, a rawn introduced a, sawi ho turin rawn move nghal se; amah ka sawm nghal e.

**PU LALCHAMLIANA, MINISTER:** Pu Speaker, kan hriat theuh angin Good and Services Tax, ‘GST’ kan tih mai hi India ramah hian kum 5 zet kan lo hmang ta a, 1<sup>st</sup> July, 2022 kha kum 5 kan hmanna champha a ni a. Mizoram-ah hian, The Mizoram Goods & Services Tax Act, 2017 chu Taxation Department-in a kengkawh a, GST regime ah hian kan ram pawhin tax revenue ah hmasawna kan hmu nasa hle a ni.

GST Act hi kan hriat thin angin Central Government leh State Government ten dual authority system-a kalpui a ni a, Central GST Act, 2017 nena hman kawp turin State tin ten mahni GST Act theuh an nei a. Mizoam pawhin, The Mizoram Goods & Services Tax Act 2017, kan nei ve a ni. GST Act hi Central emaw State emaw pawh nise, mahni duh dana lo siam that (amend) ngawt theih a ni lova, The Constitution 100 and 1<sup>st</sup> Amendment Act 2016, Article 279, A, clause-1 hmanga President in a din a ni. GST Council hian thuneihna sang tak neinin GST Act tih danglam (amend) chungchangah pawh hian ruahhmanna a siam thin a ni. Chumi awmzia chu Central ah GST Council a awm a, chu chuan he GST Act hi tihdanglam a tul a nih pawhin tih danglamna a rawn siam a. GST Act siam that a lo tul a nih chuan Finance Bill-ah bilh luh ve thin a ni a, Finance Bill ah hian GST Act chauh ni lovin, Income Tax Act te, Custom Act te, Central Excise Act te siam tha turin an dahkhawm thin a ni. Chumi awmzia chu, GST Act hi Finance Act hnuai part pakhat a ni ve a ni.

Hon. Union Finance Minister Shrimati Nirmala Sitaraman chuan Finance Bill 2022 chu 1<sup>st</sup> Feb., 2021 khan Parliament-ah a pu lut a, 25<sup>th</sup> March, 2022 ah pass a ni a. 30<sup>th</sup> March 2022 ah President hmuin, hemi ni vek hian Ministry of Law & Justice, Govt. of India chuan Finance Act, 2022 chu a notify ta a ni. GST Act hi India ram pumah inang tlanga hman tura siam a nih avangin Central GST Act tobul ber Finance Act, 2022 hmanga amend a nih takah chuan State hrang hrang ten and GST Act theuh chu amend ve thuai turin GST Council chuan a duhin a hmanhmawh hle a. Kan hnung lawka GST Council meeting wawi 47-na ah pawh sawi chhuah niin chairperson hon. Union Finance Minister Shrimati Nirmala Sitharaman chuan GST Council member kalkhawmte hnenah a rang lama mahni State-a pass theuh turin thu a chah a ni. Finance Act 2022 a

bilh telin, “The Central Goods & Services Tax Act, 2017” amend-na angin GST Council Secretary chuan State hrang hrang ten an State theuha lo legislate ve turin leh inang tlangin draft state GST Bill a siam a, chu draft, State GST Bill chu Taxation Department Govt. of Mizoram chuan lo dawng ve in State dangte ruala pass ve turin he “The Mizoram Goods & Services Tax Amendment Bill, 2022” hi alo buatsaih ve a ni.

Sawi tawh angin, Finance Act-ah hian GST bakah Act dang a tel ve vangin Central Goods and Services Tax Amend-na hi Clause 100-na atangin a intan a, Central sawrkarin dan a neih hrang hrang Income Tax Act leh a dangte hi telh ve kher Mizoram tan a ngaihloh avangin, “The Mizoram Goods & Services Tax Amendment Bill, 2022” ah hian Clause 2-na atangin a intan thung a, clause 1-na hi chu *Short title and commencement* a ni.

He amendment bill hian GST Act hnuaia section hrang hrang a khawih danglam a, chung zinga a pawimawh deuh te chu return file chungchang te, registration cancel chungchang te, late fee chungchang te, refund chungchangte a ni hlawm a, comparative statement siamin amend hma leh amend hnu ah enkawp theihin siam a ni. Member zahawm tak tak ten bill copy kha kan neih theuh ka ring a, khatah khan han en ila, amend hma a awmdan leh amend tura rawtnarawn siama kha a awm vek a ni. A detail a sawi dawn chuan a rei viau ang a, chuvangin kei chuan tun tumah chuan a *principle* chauhlinrawn sawi ka tum a ni.

Tin, Input Tax Credit chungchang a siam dang nasa hle a, ITC chungchang hi a pawimawh avangin han sawi zau deuh bik ila. ITC claim chungchangah khirh leh zual zawkin Act hi an en tura rawt a ni. ITC diklo tak hmang hian India ram hmun tam takah Invoice lem hmangin mi tam takin diklo takin an lo claim thin avangin helai dan hi siam that a ni. Kan lo chhin chhiah bik atan chuan – ITC hralh chhawn leh tura bungraw leitu ten a leina a GST an zuk pek tel hi an bungraw hralhnaa GST an pek ve tur atangin paih thlak theih tura an credit neih a ni a. Dik taka hman a nih chuan, chhiah in chher chhuan, *tax upon tax* a ti bo a, consumer ten bungrua a tlawm zawkin kan neih theih phah a ni.

Dan ang taka ITC claim theih hun hi a kum leh financial year, September hi *Monthly return file* hun last date ral hma a ni a, chumi awmzia chu financial year 2022 - 2023, tuna financial year kan hman mek chhungin ITC eng zat pawh lo khawl khawm ni sela, a kum leh financial year, 2023, 2024 chhunga September thla *Monthly return file* hun, due date 20<sup>th</sup> October hma in a claim fai vek hman a ngai tihna a ni. Entirnan: Kumin financial year chhunga ITC claim theih zawng zawnga lo dah khawm kha, nakum financial year thar 20<sup>th</sup> October hma in a claim fai vek a ngai dawn a ni. ITC hi sale a awm a, sumdawngin chhiah pek tur a neih chauhlin claim theih a nih avangin, rei tak tak eng emaw a vanga inhralh theilo ten ITC, tam tham tak tak an chan thin a. He amendment Bill hian ITC claim theih hun hi a kum leh September *Monthly return file* hun kha kha 20<sup>th</sup> October kan tih tawh kha. Last date ni tawh lovin, 30<sup>th</sup> November-ah

a sawn hma dawn ta a ni. Hei hi sumdawng tam tak tan thil lawmawm em em a ni tih ka sawi tel duh a ni.

Ka sawi tawh ang khan a original Act, 2017 a mi section chi hrang hrang ah khan tih danglam a nei a, section 16 tih danglamna a awm a ni. Chu chu a detail a sawi dawn chuan a rei lutuk ang a, kha kha Pu Speaker, tun tum atana ka sawi theih tawh ni mai sela.

He Amendment hi a thu hrimin kan hriat tlan vek tawh hnu a ni a, Central in Act a buatsaih a, chu chu ‘State in lo pass ve rawh u,’ a ti a ni mai a, choice dang kan nei lova. Lo reject emaw, lo modify vak pawh kha a rem lo a ni tih kan hre tlangin ka hria a. Chuvang chuan hei hi sawi ho ila, member ten lungual taka min pass pui ka han ngen nghal a ni. Ka lawm e.

**SPEAKER** : Awle, Minister zahawm takin a Bill chungchang a rawn move a, a rawn putluh chhan te a rawn sawifiah tawh a. Tunah kan sawi ho ang a, mipakhatin minute engzat nge kan hman ang le; minute 5 chu in pawm em? (**Member-te:** Pawm e) A nih leh minute 5 chu ti ila, sawi tur nei deuh te chu duh leh kan in belh mai dawn nia, inthlahrung lo in aw. Tunge han sawi hmasa ang le? Khi ta khi, single legislature party member a ding tlat mai. Dr. BD Chakma ka sawm e.

**PU B.D. CHAKMA** : Pu Speaker, ka lawm e. Sawihona ni lovin tlem zawhna ka nei a.

Amendment Section 16-na, sub-Section-iv ah hian, “for the words and figures, due date of furnishing of the return under section 39 for the month of September, the words, ‘thirtieth day of November’ shall be substituted” tih kha September a nih chuan financial year kan chhiar chuan September-ah chuan thla 6 a ni thin a, mahse hei hi chu September ni lovin, November-ah a sawnna chhan hi engnge ni? November a nih chuan April atangin chhiar ta ila, April, May, June, July, August, September, October, November, thla riat a ni tihna a ni a. Financial year kan chhiar dan chuan awlsam zawk chu *quarterly* pawh ni se, *half-yearly* pawh ni se, six-months dan emaw, three-months dan emaw pawh ni se, hei hi November a nih chuan thla riat tihna a ni. Kha kha khawngaih takin Taxation Minister zahawm takin min rawn sawifiah sak thei se.

*(Chair an inthlak a..)*

**DEPUTY SPEAKER** : Tan leh nghal ang aw.

**PU B.D. CHAKMA** : Ka lawm e, Pu Dy. Speaker. Amendment of Section 39 of the Principal Act, sub-Section (5) ah khan, “for the word ‘twenty’, the word

‘thirteen’ shall be substituted” a ti a, kha pawh kha enge awmzia? “twenty” ni lovin “thirteen” kha engtinng e an pawm tih kha.

Tin, a tawpna atan, Amendment of section 54, last para a ‘ba’ tih kha incomplete sentence a ni emaw ka ti deuh a, kha pawh khawngaihtakin min sawi fiah sak theih se la. Tin, “in case of zero-rated supply of goods or services or both to a Special Economic Zone developer or a Special Economic Zone unit where a refund of tax paid is available in respect of such supplies themselves, or as the case may be, the inputs or input services used in such supplies, the due date for furnishing of return under section 39 in respect of such supplies” tih kha, a last sentence ah hian missing a awm em aw ka ti deuh bawk a ni. Pu Dy. Speaker, ka lawm e.

**DEPUTY SPEAKER** : Hun i hmang tawh hle mai. Pu Lalduhoma kan sawm ang a, a ni hian minute 10 a nei dawn a ni.

**PU LALDUHOMA** : Pu Deputy Speaker, ka hun ka hmang zo lo ang a.

Kan ngaihlak tak ang khan Central GST Act an amend apiangin chumi dungzui chuan kan lo tih ve a ngai thin a, chu chu Minister in a rawn chhawpchuak a, han sawiho ngaihna pawh a awm lova. Pass tur kha a ni mai a, pass loh theih loh a ni a, kan pass mai turah ka ngai a. Amaherawhchu han zawh chian deuh duh ka nei a.

Khami amendment rawn propose-ah khan a bul 2-na, section 16-na amend dan turah khan, “section 1 (b), in clause (c), the words, figures and letters “or section 43A” shall be omitted” a ti a, omit tura kha ka hmu zo tlat lo mai a. He Dan hi tunhma pawhin kan lo amend zeuh zeuh tawh thin a, 2021 Amendment thleng khan a Main Act a te hi kan en a. Helai section 16 (1) clause (c) a ‘omit tur’ a tih hi ka hmu tlat lo mai a. Tih sual palh te a awm thei a, fimkhur thil thuah ka han point out mai mai a, keiman ka hmu thiam lo nge ni?

Tin, han zawh duh ka nei a. Khulamin an rawn amend chuan helaihan kan chet ve zel a ngai a, kan hria a. Khami ni lo khan keimahni Mizoram GST Act a hi Central GST Act nena inmil lo thil te a nih lemloh chuan kan amend ve thei em, keimahni Act lo siana hi, keimahniin tha kan tih angin? Tul kan tih hunah a *Act* emaw, a *Rules* emaw kha kan lo ti danglam ve thei em tih kha a rawn wind-up pahin min han hrilhfiah thei se a lawmawm khawp ang.

**DEPUTY SPEAKER** : Aw le, tunge kan han sawm leh ang aw? Han sawi duh kan awm tawh lo nge, a chiang tawkah kan ngai deuh nge ni? Ni e, a *Dan* kha lo tihdanglam hleih theih kha a ni bawk si lova. A nih leh kan insawm mai dawn em ni?



A *Dan* kha kan ngaihthlak ang khan ‘*Vaki tawng thei*’ tih ang deuhin helaia kan lo tihdanglam deuh theih kha a ni bawk si lova. Member ten kan chiang tlangah han inngai ta ila. A nih leh sawi tur kan awm tawh lo a nih chuan, kan Minister zahawm tak a bill te wind-up turin kan sawm ang a, House pass pui tura dil nghal turin i lo sawm ang u. Minister zahawm tak Pu Lalchamliaana.

**PU LALCHAMLIANA, MINISTER:** Pu Deputy Speaker, ka lawm e.

A tua mah tak tak hian kan la bel lova, Council member te ho pawh hian kan bel chuang lova. Kan zir chawp zel a, thla tin deuh thaw hian notification hmang te hian an rawn ti danglam a ni a. Kha, tunah pawh khan notification ka rawn lay kha 17 lai a ni a. A tih danglam - a rate te, a rules te tih danglamna kha a lo kal reng a ni.

Member zahawm tak Dr. BD Chakma sawi kha, September ni tawh lovin November-ah engatinge tih ka hre bik chiaah lo na a. Amaherawhchu a chhan pakhat kan official ho sawi dan chuan, *input tax credit* sumdawngin Delhi, Kolkata, Bombay vela bungrua an zuk leinaa GST an chawia kha an hralhchhawn leh turah khan, hei Pu Zodintluanga te, Pu Chhuana te hi sumdawng deuh anni a, an hre deuh mai thei a, Pu Rindika te pawh. Kha miten bungrua an zuk lei, an hralh chhawn tura kha rei tak hralh thei lovin a awm thei a ni, engvang pawhin. Covid lai phei kha chuan kha kha a hluar khawp a. Khami te khan a next financial year, October ni 20 hmang ITC kha an claim tur a ni ta a. Claim hman lo kha an awm a, tax kha tul lovah chawi teuh an awm ta thin a. Chuvang chuan, hun an extend sak tihna a ni; October ni 20 ni thin kha November thla pum thleng hun an pe ta a. Hei hian sumdawngte tan *input tax credit* claim dilna kha hun a pe tam ta tihna a ni a. Tin, ‘sub-Section 5 of section 39’ kha chu ka hre chiaah bik lova, 20 aiah khan 30 kha an duhsak ta deuh a ni ang e tih kha ka rin dan a ni ve a ni tih kha kan sawi duh a.

Tin, ITC chungchang kha, kan sumdawng hote fimkhur ngaih em emna chu hetah *registered GST payer* an lo nih chuan, GST hnuai in register an nih chuan, sumdawnaa an zuk dawr tura te hi GST hnuai in register sumdawngte an nih loh chuan ITC kha an claim thei lo a ni. Chuvang chuan, an zuk dawr tura te kha GST hnuai in register te ngei an dawr ang a, kha mite ina ‘cash memo’ kan tih mai invoice tha tak an pek kha chuan khuta tax an lo pek tawh kha an claim let leh thei ta a, hei hi kan fimkhur a ngai khawp mai. Tunah phei chuan hei, tunhnaiah contract works-ah te hian 12% ni thin kha 18% ah GST an rawn ti sang ta a. Chuvang chuan, khangah khan kan contractor-te pawhin harsatna an neih loh nan, anmahni kha GST-ah an in register ve a ngai a, registered contractor te chu. Harsatna an neih loh nan cement te a *black* in lei mai mai lo se, iron-rod te pawh ‘GST register seller hnen atang ngeiin lei thei se’ tih hi duhthusam a ni.

Tin, member Group Leader zahawm tak Pu Duhoma han sawi, ‘keimahniin kan amend ve thei em’ tih kha chu ka hriatthiam dan chuan kan thei lo. GST Council in India ram pumpuiaah *One Tax, One Nation Policy* a kalpui a. Chuvang chuan, heng *Act* amend-na tur hi chu ‘GST kaihhraina hnuai zelah kan tih a ngai’ tih kha ka sawifiah thiam dan ni ta se.

Tin, helai section 16-na amend tura ‘(b)’ tih hi, khami 2017 Act nei lo tan kha chuan a hmuh theih lova. Kan in pek zingah hian a tel lova, tunhma khan Mizoram Goods & Services Tax Act, 2017-ah khan member-te kan in pe vek tawhin ka hria a. Khatah khan section 43 (a) kha omit tura tih a ni. Khatah khan a rawn ziaak na a, amah 16 chhung a amend tur ni lo in 16 atang hian 43 (a)-na kha a omit dawn ta tih na a ni. Kha kha .... (*Pu Lalduhoma*: hei hi a thar min pek kha a ni si a, a awm si lova. An lo omit der tawh zawk nge ni?) a copy i ken lai kha a ni ang a. Khatah khan a awm lo anih chuan ka hrethiam tawh bik lo khawp mai; 43 (a) kha ‘omit tur’ a ti a ni. A dang a awm lo, 43 (a) awm thin a kha ‘a awm tawh dawn lo’ tihna a ni a. Helai 16-ah hian a rawn ziaak a. 43 (a) kha ‘omit a ni’ tih kha ziaak mai sela a confusing lo deuh zawk awm e. Keipawhin ka hrethiam chiaah lova a tirah. Kan *X* a, engnge a awmzia ka ti a, mahse kha kha a awmzia deuh chu a lo ni.

Pu Dy. Speaker, remchangah lain kan GST Act hi kan hlawkpui dan te leh Taxation Department in thanhnemngai leh taima taka an hmalakna tawi te hi sawi lan tel thain ka hria a. 2021-22 khan Taxation Department hi tunah pawh a la ni a, thlur thumin tax hi kan la a, chhiah kan khawn a, a pui ber chu ‘GST’ a ni; heath hian 81% vel Taxation Deptt.-in kan lakna atanga chhiah kan hmuh a ni. A dawt lehah chuan ‘Professional Tax’ a awm a, hetah hian vaibelchhe 16 dawn nikum khan kan hmu ve a. Tin, ‘VAT’ kan tih mai atang hian petrol, diesel leh khatiang te te kha a awm a, khang atang khan vaibelchhe 113 zet kan hmu bawk a. A bak vaibelchhe 894 kan hmuhnaah hi chuan a pui ber chu GST atanga kan hmuh a ni. Nikumah khan vaibelchhe 650 hmu turin min tuk a. Tichuan vaibelchhe 67 in min tihpun sak a, kan hmuh tur kha, chu chuvaibelchhe 717 a lo ni ta a. Chuti chung chuan vaibelchhe 177 zet in kan target kan khum a ni. Tichuan, nikuma Taxation Department in Revenue a chhun luh zawng zawng hi vaibelchhe 894.75 lai a ni hi a lawmawm tak zet a, thawktute an fakawm hle a ni.

Tin, kuminah hian nikum aiin min tuk sak sang deuh a, vaibelchhe 730 hmu turin min tuk a. Tun dinhmunah August thla ral ta thleng khan vaibelchhe 416 kan hmu tawh a, thla nga chhungin vaibelchhe 416.45 hi kan target atang chuan 57% a ni a. Kan tluan zela harsatna dang a thleng te a nih loh chuan kan target vaibelchhe 730 hi chu khum leh ngei turin kan inbeisei a. Rim takin kan department officer te leh thawktu dang ten an thawk a, chumi avang chuan Saitual, Khawzawl, Hnahthial District tharah te pawh hian Taxation Department hi ‘min hawn sak ve tawh rawh u’ tiin rawtna te pawh an siam a, tunah hian sawrkarin a ngaihtuah mek a. Khangte kha pawh kha a hlawhtlin ngei kan ring a. A chhan chu kan House Leader leh kan Deputy Leader te pawh hi an

benghriatah kan sawi ri tawh a, ‘Taxation chu a pawimawh a lawm’ min tihsak a, kan lawm khawp a. Hemi kan tih pheih chuan tun aia tam leh zual hi Taxation Department hian kan lalut thei turah kan inbeisei a ni.

Pu Speaker, kan hrethiam theuh a. Chuti vaka han sawi theih chi pawh a ni lo tih kha kan hretlang theuh a. Member pahnih ten query te an han nei a, a lawmawm hlein ka hria a. Amaherawhchu, chhanna duhthusam kan pe theilo erawh chu pawh ka ti khawp mai.

Tichuan, Pu Dy. Speaker, he House zahawm tak hian, ‘The Mizoram Goods and Services Tax (Amendment) Bill, 2022’ hi min pass sak turin ka rawn ngen a ni e. Ka lawm e.

**DEPUTY SPEAKER** : Aw le, kan Minister zahawm takin ‘The Mizoram Goods and Services Tax (Amendment) Bill, 2022’ chu House pass pui turin a rawn dil ta a, tunah kan buk ang a.

Pass remti zawngin ‘remti’ ti ula. Remtilo kan awm chuan, ‘remtilo’ kan ti dawn nia. Kan remti em le? (**Member-te:** Remti) A lawmawm e.

Aw le, ‘The Mizoram Goods and Services Tax (Amendment) Bill, 2022’ chu House-in lungual takin a passed ta a ni.

**PU LALCHAMLIANA, MINISTER** : Pu Dy. Speaker, ‘remtilo’ i ti miah lova, ka lamah i tang niin ka hria a, ka lawm khawp mai. House zahawm takin bill min passed sak avangin ka lawm e.)

**DEPUTY SPEAKER** : Kan remtih tlan hmel em mai a, ka han ngawi tlanga lawm le.

Aw le, vawiina kan *business* chu kan zo ta a, naktuk, Ni 7.9.2022 (Nilaini) chawhma dar 10:30 AM-ah kan thukhawm leh dawn nia.

*Sitting is adjourned. (12:13 PM)*